

A2^r

Allen vnd yeden meinen genã-
digen/ gũntigen/ vertrauten/ lieben herren/ vnd wa-
ren freunden/ were oder wo die feien/ wũnsche ich Georg
Frõlich von der Lõmnitz/ yetzt zũ Kauffbeürn/
alle wolfart/ glück vnnd haile.

WOlgebornē/ geftrenge/ hochgeleretn̄/ edlen/
vheften/ fürlichtigen/ erfamen vnnd weifen/
genedig/ gũntige/ vertraut lieb Herrn vnd
freündt. Jch hab das bũch Joannis Stobei
nit mitt weniger sorgfeltigkait/ dann mühe
verteüdfcht. Der augenfchein würdt die mü-
he zũerkennen geben. Sorgfeltig aber bin
ich darumb geweiß/ vnnd noch/ daß sich ett-
lich diefer hochuerrũfftiger fcharpffer le-
rē/ in Teütfche fprach fchwerlich bringen laß-
fen/ vnd daß difer zeit wenig dancks in der welt zũuerdienen ift. Ja
ob gleich etwas vnwandelbars vnd nützlichs der gemaine/ vnd den
nachkommen zũ wolfart verehret vnd gefchenckt würdt/ kan es doch
vor den feindtlichen zungen nit vnaußgericht bleiben. Derwegen ich
lang vnd vil auff alle ort gedacht/ wahere vnd wene ich zũ ainem ge-
legnen verpfecher diefer meiner arbeit bemühen folt. Gleichwol ift
nit one/ daß mir an groffen herren vnd magiftraten/ dene ich viel jare
gedient/ vnd zũm tail noch verpflichtet bin: deßgleichen an fonderbarn
hochs vnd mittels ftands perfonen nit gemangelt/ wie jr ettlicher maß
felbs wißt. Diweil aber das bũch Stobei ain gemainer außzuge al-
ler menfchlicher lere/ fitten vnd wandel/ svnd alfo in viel articul ver-
faßt ift/ hat mich fur das rhatfamift angefehē/ das felb auch jren vieln
zũfchreibē/ wie es dañ jrer vieler verpruch vñ verthedigung vor den
fchlipfferigen vergiffen zungen/ der rainen furcht ich nitt/ villeicht
bedõrffen mage. Demnach genedig/ gũntig/ vertraut lieb herren vñ
freündt/ habt euch difes mein werck der verteüdfchung/ von mir zũ
gũter gedächtnus: auch zũ vnuerruckter vnd im̄erwender freündt-
fchafft hiemit verehret vñ gefchenckt/ verthedingts vñ verprechts/ fo
ferr vnd weitt es zũuerfprechen/ vnd verthedigen ift. Für mich bin ich
der hoffnung/ ob es gleich bey meinem leben wenig anfehens haben
folt/ daß es doch noch mit der zeit den redlichē teütfchen gemaines vn-
fers geliebten vatterlands/ wolgefallen vnd rechte frucht/ auch ainen
anfang der alten weifen gelerten vnnd frummen mannen tugenden/
mit teütfcher fprache zelernen/ zelernen/ vñ würcklich zũüben/ geben
werde: welchen vralten/ ich Chriftlichen glauben/ vnnd den Chriften

der felben vralten haiden redlichait/ ftercke vnd beftändigkait/
da es immer ftadt hett/ von hertzen wüñfchen
wölt. Geben zu Kauffbeürn. 14 tag
May. 1550.

A 2 Georgen

A2^v

Georgen Frölichs/ genant Letus/ von der Lōmnitz/
Vorrede/ inn das übertreffenlich bûch
Joannis Stobei.

JSt es zimlich vnnd gebreüchig/ in ainig bûch
vorrede zûschreiben: wie es dañ im brauch hârkommen/
dem lefer zû befferm verftandt/ vorberaitung zemachē:
auch den werckmaifter vor bittrikait der ſcharpffen zun-
gen zûuerwaren: fo folt es hiebey von billigkait wegen
nit allain zimlich/ fonder auch notwendig fein. Dann
des bûcherſchreibens (als Salomon ſagt) kain ende/
vnnd fonderlich difer zeyt/ fo vil vnd gemaine ift/ das
meniglich fo wol ab dem lefen/ als ab dem kauffgelt ab-
ſcheuch vnd verdruß tragen môcht. Vnnd wiewol ge-
mainlich aller bûchere tittel vnnd überſchriſſten/ ain
prachtlichs anfehen haben/ vnnd dem lefer vnſäglichen nutz verſprechen: fo erfindet
ſich doch vilmals/ im durchgang fleißigs leſens/ gar ain anders/ vnd etwa kaum fo
vil daß es leſens werdt. Hie môcht aber yemandt ſagen: Was erregt ſich dann da
neüwes/ wil aber ain neüwer renner auff die ban? wöllen die gebirge berhafft/ oder
die meüß lachend werden? hat man nie haidniſche ſchriſſten geſehen? Were es nitt
besser/ vns bey difen zeyten/ mit der hailigen Propheten/ Euangeliften/ vnd andern
Chriſtenlichen bûchern zetröſten/ vnnd das haidenthumb zûruck zefellen? Denen
antworte ich durch den mundt der warhait: Man muß das thûn/ jhens aber nit vn-
derlaſſen. Dieweil dañ difes bûch der hailigen göttlichen geſchriſſt (die mir auch ai-
nig vor/ vnd über alle andere zûm höchſten lieber) nit fonders zûwider/ ja zur Chriſt-
lichen zucht hoch furderſam fein mage: zû dem es auch auß der aller vernunfftigſten
vnd ſinnreichſten vralten Griechen/ welche bißhere vnder allen haidē den preiß vnd
lobe der kunſt vnd vernunfft erhaltē/ bûchern zûſamen gezogen/ vnd mit wenig wor-
ten klare zemelden/ die gantz menſchlich tugendt/ welen/ vnnd wandel/ ſampt jren
vmbſtendē vnd gegenwürffen dariñ begriffen: fo folt es ye niemandt gehâßig noch
vngenâme/ fonder aller billigkait nach/ meniglich zû danckbarñ gefallen fein.

Vnnd nach dem diſe groſſe vernunfft vnnd weißhait vrſprünglich/ in mancherlai
art der Griechiſchen ſprach/ nit mit ſchlechten gemainen worten/ fonder gantz künſt-
licher ſcharpffinniger weiß beſchribē: alfo das ſolcher leer vnd kunſt/ wolgeübte vnd
erfarne/ bey den hohen ſchûlen noch auff difen tage zû befondern wûrden vnnd ſten-
den erhôhet werden: fo ift zûerachten/ daß nit ain yeder lefer dermaſſen mit verftandt
begabt ſey/ daß er allen inhalt diß bûchs/ erſts antritts nette vnd gar faſſen/ vnd ver-
ſtehen werde. Es ift auch die Griechiſche ſprach/ in den geſchribnen vnd ettlichē ge-
truckten exemplarien/ wie ſich der hochgeleert vnd theür mann herr Cûnrat Geßner/
Doctor/ mein warer lieber freündt/ welcher difen Stobeum erſtlich auß der Griechi-
ſchen ſprach in das Latin gebracht/ hoch beklagt: aintweder durch ſarlâſigkait oder

vnerftandt der büchſchreiber vnd trucker/ nit wenig dunckel/ vnd an ettlichen orten mangelbar/ aber doch nichts vnergründet/ noch dermaffen verfinfert bliben/ daß es nit zů rechtem gütem verftandt gebracht were. So vil mein verteütſchung belanget/ verhoffe ich/ die felb foll dem fleißigen leſer lauters verftandts genůg geben.

Vber das alles/ kan ich mich nit erinnern/ daß dergleichen ſcharpffinnige leeren/ welche nahend mit allen freyen künftē tail neñen/ ye in teütſcher ſprache geſehen oder geſehen worden: außgenummen etliche bücher Marci Tullij Ciceronis/ von den ämp tern/ von der freündtſchafft/ vnd wunderfamē ſprüchen/ ꝛc. welche auch verteütſcht ſind: wie angeneāme aber/ vnnd mit was frucht/ daß ſey den Lateins vnnd Teütſches/ zůgleich woluerftendigen/ zůurtailen haim gebē. Vnd ob ſchon ſolche vnd dergleichen bücher/ zierlich vnd volkommē zů teütſch herfür gebracht/ ſo weren ſye doch bey weitem/ kain vergleichung noch erfattung des gegenwertigē büchs Stobei: vil weniger der brunnen oder quelle/ ſonder allain die hierauß rinnenden flüßlin. Dañ auß der Griechen büchern/ gleich den vrfrünglichen quellen/ die Cathones/ Scipiones/ Cicero/ Virgilius/ vnd in gemain alle eltiften Latiner/ jr kunft vnd weißhait/
gleichwol

A3^r

Vorrede.

gleichwol mit zierde/ lieblichait/ vnd etwan mit befferung vnd ſchönen zůfätzen/ geſchöpfft vnd gezogen. Darumb/ ſo vil die vrfprung den weit dannē gerunnē bächen/ mit krafft vnd gůte: ſo vil ſind die vralten leerer/ den auß jne wachfenden nachkummen fürzetetzē. dardurch ſol aber niemandt verklainert ſein/ ſonder meniglich bey billichem růme vnd preis bleiben. Dieweil dann mein klage/ etlicher duncklen wenig ſprüche halb diſes bůchs/ ſo wol als meins freündts/ herr Doctor Geßners/ iſt/ vnd ſich die Teütfche ſprach noch minder/ als das Latin/ mit dem Griechiſchē vergleicht/ ja vil Latinifcher wort/ hievor mit teütfcher zungē nie aintzlicht one vmbſchreibung vñ zůfätze außgetruckt wordē: als in den Worten/ Affectus, habitus, qualitas, decorū, indecorum, vnd andern vil mer zůuernemen iſt/ vnd alſo diſe verteüfchung befondere erfarenhait erfordert/ ſo möchte velleicht ain frag entſtehen/ ob ich meer auß vermefſenhait/ dann auß liebe zům gemainen vatterlandt/ die handt an diſen pflůg gelegt hette. Darüb mir verhoffenlich niemandt verweiſſen würt/ ob ich diſes meinēe wolgemainten vorhabens vrfach vnd gelegenhait/ etwas notturfftiglich hiebey anrůre.

Es iſt ye ware/ vnnd iren vil vnder den lebendigen diſer zeyt noch bewiſt/ daß ich von jugendt auf/ mit vnnd bey den freyen/ littlichen/ vnd dergleichen künſten vnd übungen harkummē/ mich bald nach verlaſſung der ſchůle in meiner jugendt zů meinen gnädigſten vnd gnädigen herren/ Pfaltzgrauen bey Rhein/ Chur vñ Fürſten gebrüderen / in Cantzleydienſt begeben: nach etlichē jaren bey der berühmten Statt Nürnberg Cantzley/ zehen jare mit ehren volbracht: vnd volgends das Stattſchreiber ampt/ in der krone aller teütfchē Stette/ Augſpurg/ zwölff gantze jare getragē: vnd binn nun nahend dreißig jare/ nie one anſehenliche Cantzley verwaltung vnd dienſt gewefen: Gott wölle/ daß mein fleiß vñ mühe/ dem gemainen nutz ſo wol erſproffen ſey/ als ichs treüwlich/ vnb mit emblichem gemüte gemaint vnd gethon hab.

Demnach were ſich nit zůuerwundern/ ob ich in ſo vil iaren/ durch onunderläſiger übung vnd gebrauch Teütfcher vñ Latinifcher ſprach/ die ich ſtāts neben vñ miteinander gefürt: auch ainer mit der andern nit wenig geholffen/ ettwas vor andern mechtig vnnd leüffig worden: wiewol ich ſelbs entpfinde vnd bekenne/ wie ſchmal man decke/ vñ wie ubel ich gefiddert ſey. Gewißlich iſts aber ware/ wa es one ſolche mein langwyrige übung geweſt/ daß ich mich kains wegs vnderſtandē/ diſes nützlich vnd ſinnreich bůch Stobei dergeltalt anzerůren. Als ich aber des ſchwerē überläſtigen/ bey meiner zeyt Stattſchreiberampts zů Augſpurg/ durch die Römifche Kaiferliche Ma. herren Caroln den fünfften/ vnfern allergnedigſten herrē/ auff den dritten tag Auguſti/ des fünfftzehenhundert achtundvierzigſtē jars/ unnerletzt meiner ehren ja mit meinen ehren allergnedigt erlaſſen wordē/ vnd dardurch zů mehrer růwe kummen binn/ hab ich mir gantzlich fürgenummen/ die überigē tag meines lebens/ Gott zů lobe/ vnd dem Vatterlandt zů wolfart/ mit übung der mir verlichnen gaben/ on ſchwāre ämpter/ in langsbegerter růwe vnd Friden zůzebringen.

Vnd wiewol ich vor diſem ain bůch in Latinifcher ſprache zůſchreiben angefangē/

vnnd darinn weit fůrgelchritten binn/ hab ich doch/ als mir der Stobeus/ vnnd die vnwidergultig arbeit/ herren Doctor Cunrat Geßners/ im Latin fůrkommen/ auff freůndtlich anhalten vnd bitt/ zwaier meiner besonder lieben freůnd zů Augspurg/ alle ander mein arbeit zůrucke gefelt/ vnd meinen fleiß vnd můhe an den Srobeum gelegt: auch den selben mit vnser můtersprache leren reden: wie fruchtbar aber/ vnd mit was gnaden/ befilch ich dem frummen leser zůurteilen. Den ich auch hieneben/ őrber das wie vor gemelt/ erinnern thůe/ dař an vil ortē difes bůchs/ subteile vn kůntliche gesprāche ein gefůrt werden: wie dann des Platonis/ Xenophontis/ vnd ander weisinnigkait/ durchauř/ auff frage vnd antwort gefelt/ da zwo perfonen mitainander reden. So sind des Ariftotelis/ vnd funft meer leeren/ gantz scharpff hierinn verfařt/ welches manchem verdrořnen vnnd vnfleisigen teůtfchen leser/ abfcheůch vnd vnwillē geben mōcht. Des sol sich aber niemandt irren lassen: dann were ettwas besonders/ nit yederman gemains/ vnd in den wůrtsheűfern vnd bādern (als man sagt) vmbgezogens/ mit feiner vernunfft ergreifen/ vnd sich darinn erlůftigen wil/ der můř feinen verftandt vnd gedancken őrbersich heben/ vnnd sich emfigs fleiß vnd dichtens nit bethauren lassen. Sind dann jr/ meine liebē Tteůtfchen/ ettliche jar hāre/ mit eűwerer vernunfft vnnd verftandt so weit kumen/ dař jr nit allain allen andern nationē/ in allen beschribnen vnd vnbeschribnen kůnften, mit hochgeleerten kriegs/ kauff/ vnd handtwercksleűten/ gleich/ ja őrberlegen worden/ fonder habt

A3^v

Vorrede.

auch vil neüwer vnerhörter werck erfundē/ als groß vn̄ klain gefchütze/ von büchfen vnnd puluer/ die edle kunft des Bûchtruckens/ gantz wunderbarliche instrument/ sich felbs bewegender/ hendt vnnd füß regender/ auch fürschreitender bilder: auch anders/ vnnd das aller grōft/ so noch an haimlichen orten verborgen ligt/ durch die gnade/ so euch vor allen andern mitgetailt/ erfunden. Darab lauter zûnerneñen/ daß euch weder an den gaben Gottes, noch einfluß des himmels manglet: warumb solt euch dann der wege/ zû begreiffung der Griechen vnd Lateiner/ littlichen vnnd artlichen künften verchlossen sein? Warumb solt man sye auch in Teütscher sprache nitt dermassen können fürlegen/ daß sye darauß zelernen vnnd zûuerstehen sein möchten? Darumb wann jr eüwere gedanken hierinn/ wie in andern/ das vil vnwerder vnnd nachgültiger ift/ gebrauchend/ so werden jr nir allain ergötzlichait vnnd freude/ fonder auch ehre vnd wolfart herauß schöpffen vnnd begreifen. Jr kummend zû hohen oder nidern Regimenten vnnd Magistraten/ oder lebend als sonderbare perfonen/ in reichumb oder armüt: so sehend jr inn difem bûch/ gleich ainem klaren spiegel/ wie vnd was jr nach dem richticheit der gerechtigkeit/ billichait/ ehren/ erbarkait/ ftercke/ vnnd bestendigkeit/ thûn oder lassen sollend/ das gegen meniglich vnuerweißlich feye. Zû dem/ erfordert gar ain ringer tail difes bûchs/ scharpffes nachdencken: das ander aber/ ift so lauter vnd klare/ als die mittägliche sonne. Solches hat mich hiebey treüwer mainung/ vnd darumb einzeführen/ fur gût angefehen/ ob dem Vatterlandt auß pflanzung gûts gewächß/ gefchmackte fruchten (deren es difer zeyt in hohem mangel ftehet) gedeyhen möchten. Dann allem anfehen nach/ wie wir in reichumb vnnd geschwindigkeit/ gelt vnd gût zûüberkummen: auch in üppigkeit/ frechhait/ vnd überflusigem wolluft aufgestigen/ ich gefchweig der verghessenhait altuätterlicher handtuefte: wer wil sich anders dann schweres fals beforren? Wie möchte es auch one sein? Niemandt/ oder ye gar wenig/ handlē jr narung in zimlicher maß zûerobern/ vnnd benüßig zewerden/ fonder yederman ftreibt nach dem überfluß: nitt allain seinen ftandt zûerhöhern/ fonder auch dem reichften vor seinen augen gleich zewerden/ oder gar fürzeziehen. Ja mancher dunckt sich geschmâcht sein/ wann sein geschwindigkeit vnd list ander nit übertreffen solten? Was mage dann gûts darauß werden? Das sey außschwaiffender weiß hiebey gûter mainung angeregt. Aber wider dahin zekummen/ da ichs gelassen/ hab ich mich befliffen/ inn difem gantzrn bûch durchauß vnnd auß/ kain ainig Latinisch wort/ so nit hievor den teütschen gantz gemaine grwefen/ darzû auch kainer thieffgelüchten vnd gleiffenden zabelwort (wie ettliche kützelige Schreiber auß vnwillenhait pfleglich thûn) fonder ainer weitgewonlichen gemainen teütschen sprach/ nitt zûuil außlenlich/ noch einhaimlich/ zû meniglichs beßferm verstandt/ zûgebrauchen: vnnd dadurch verhoffenlich/ vnfer angeborne sprach nit geunehret oder geschmâleret/ fonder gezieret vnd gemeeret.

Weiter aber von der frucht vnnd nutzbarkeit difes bûchs zemelden/ darffe es nitt

weitgeholter langer außführung: allain gedencke ain yeder bey jme felbs/ ob er nit das goldt vnns selber/ lieber rain vnd fein/ weder in den handtftainen vnd ftuffen: den kern vnnd das traide/ lieber außerklaubt vnd geworfft/ weder in den iren vnd fpreüwern haben/ dann folches allererft durch das feür/ drefchen/ fchwingen/ vnnd feübern/ mit groffer mühe vnnd koften/ auch mit wagnuß/ ob es güt oder böß/ wenig oder vil wurde/ zû nutzlichem gebrauch bringen wolt/ fo wurde er fich in dem bald entfchaiden.

Geliebt dir nun alles/ was die gelertesten Griechen/ inn der zale ob dritthalb hundert/ dey fybenhundert vnnd viertzig jaren/ vor Chriffti geburt/ vnnd darnach zwaiß hundert vnnd neünundliebentzig jare/ biß auff die zeyt des Kaifers Probi/ vnnd etwas weiter/ vernünfftigs vnnd fürbündigs gefchriben haben/ in ainer fumma/ raine/ lauter/ vnd fein beyfamen zefi[n]den/ vnnd daß durchlefen vil hundert bücher/ darauß dife leeren gezogen find/ deren gleich wol ain güter tail nitt meer vorhanden/ züerfparen/ vnnd gleichen oder mehrern nutz/ mit denen/ die fich alles zûdurchgründen vnnd ergrüblen vnderftehen/ zefchaffen/ fo life difes büch Stobei.

Jft dir dann nit gelegen das gantz büch zûdurchlehen/ fo nimme dir für/ warzû dich yedes mals der luft oder die notturfft bewegt. Es fey von der tugendt in gemein/ von der furfchtigkait/ ftercke: vnnd alfo von allem/ daß dem menfchlichen leben vnd fterben anhangt/ fampt aines yeden gegenwürffen/ deren innhalt nechft
nach

A4^r

Vorrede.

nach difer vorede ordenlich verzeichnet ift/ fo wurdestu (ich sey dann betrogen) fa-
 chen vnnd vernunfft/ biß zûr höchften verwunderung/ lehen vnnd innen werden:
 auch darneben verneñen/ das vilerlai gebreüche/ vnnd angemaßte gottsdienft auß
 der haidenfchafft inn die Chriftenhait gezogen ift/ fo gar/ das ich mich darab entfê-
 tzen müffen. Darab foll sich aber niemandt ergern/ daß gemainlich von vil göttern
 nach der haiden gebrauch: wiewol auch offtermals von ainem ainigen Gott/ aber
 vaft durchauß/ von leeren vnnd fatzungen/ vnferm hailigen waren Chriflichen glau-
 ben wenig zûwider/ einfürungen gefchehen. Dann dem frummen Chriftenlichen
 lefer/ find dife ding leichtlich mit befferung zûunderfchaiden: Vnnd wie Virgilius
 thâte/ da er in durchlefung des Poeten Ennij gefragt warde/ was er darmit main-
 te/ fprache er/ Ich klaube das goldt auß dem kath/ herlichen groffen nutz zefchaf-
 fen. Für mich/ mag ich mit warhait bekennen/ daß mir vor durchläfung difes büchs
 vngleüblich gewefen/ daß Gott den haiden dermaßen vernunfft/ tugendt/ vnnd
 erbarkait/ die sich in vil wege mit der hailigen göttlichen gefchrifft gantz vnnd gar
 vergleicht/ verliehen hett.

Des feye auch meniglichen hiemit bericht/ daß ich in difer meiner vertolmet-
 fchung/ die Teütfche zungen nach den Lateinifchen worten nitt genötiget/ noch ge-
 zwungen/ fonder vil meer auff den waren finne vnnd verftandt gefehen: auch mich
 etwan meer/ etwan minder wort/ weder des Latins gewefen/ gebraucht/ vnd allen
 inhalt/ fo klare mir immer möglich gewefen/ außgetruckt hab. Were es aber zû bef-
 fern waiß/ dem/ vnd allen lefern/ vergönne ichs von hertzen 7 wil jme auch darumb
 lobe vnd danck fprechen. Vnd ob wol (als hievor gemeldet) etliche fprüche erfts an-
 sehens/ dunckeln vnd vnlautern verftandt duncken haben/ fo waiß ich doch kainen
 im gantzen büch/ der durch fleifsigs erwegen vnnd nachdencken/ nitt zû rechtem
 gûten verftandt zebringen were/ des ich gûten bericht vnnd rechenfchafft geben
 kônte. Was aber im Griechifchen vnd Latin bißweilen abgangen/ vnd gemangelt/
 das/ welchs doch gar gering/ vnnd nit zûachten ift/ würt hie auch ablauffen/ vnnd
 nit zûfüchen fein.

Vber das/ foll meniglich erinnert fein/ daß difes büch Stobei/ biß auff difen tag/
 zwaimal/ vnd verenderlicher weiß/ Latinifch im truck außgangen. Ee vnnd aber der
 ander truck vorhanden geweßt/ hab ich den erften über den halben tail/ allgerait ver-
 teüfcht gehabt. Nun befindet sich aber in folchen zwaien trücken ain groffer vnder-
 fchaid/ nitt allain der fpruchreden oder capittel ordnung vnnd zale halb/ fonder auch
 das ainer mehrers/ vnnd klärers innhalts ift als der ander. Namlich begreiffet der an-
 der truck meer Spruchreden weder der erfte: So fahet auch das felb büch an tugendt
 in gemain zehandlen an: wie auch meins erachtens am fôrmlichften ift. Darge-
 gen vnnd herwiderumb/ begreiffet der erfte truck an ettlichen orten meer als der an-
 der. Es werden auch die eingefürten fprüche/ in ainem etwan anderer gefalt/ we-
 der im andern angezogen: welchs aber keinen mangel bringt/ vnnd wol fein mag.

Als ich aber deffen im durchgang geware worden/ hat es mir gleichwol merckliche mühe vnnd arbeit/ vnnd das werck gantz ſchwere gemacht. Dann ſolt ich die gefunden befferung des andern trucks/ gar vmbgangen haben/ vnnd bey dem erften allain bliben fein/ daß hett den Latinern/ fo den andern vnnd erften truck gegen dieſer verteütſchung geſehen/ villeicht verdacht der vnwiſſenhait gebracht. So were mir überſchwerlich gewefen/ den andern truck aller ding nach dem erften zericthen. Derwegen ich im mittel gangen/ hab ettliche Spruchreden/ als die von der tugendt vnd boßhait/ auß dem jüngern truck verteütſcht/ vnnd die felben dem eltern vorgeſetzt: auch funft ander meer vergleichung/ hin vnnd hãre in beyden büchern gethon/ vnnd verhoffenlich/ ain rechtſchaffen werck außberait.

¶ Befchließlich von dem Stobeo/ diſes büchs vrfprünglichem Maifter/ were/ vnnd von wannen er feye/ wurt wenig gewiſs anzaigens/ aber ettwas vermũtung gefunden: namlich/ dieweil er den namẽ Joannes hat/ vnnd kain haide ye alfo genennet iſt/ daß er glaubens vnnd Religion halb ain Chrift/ von geburt aber ain Griech gewefen/ vnnd zûr zeyt des Kaifers Probi/ oder bald hernach gelåbt habe. das were/ nach Chrifti geburt vngefãrlich/ zwaihundert neünundfyebentzig jare/ welches ernanter herr Cûnrat Geßner Doctor/ inn feiner Latinifchen/ diſem büch fürgeſetzten anlaitungs rede/ gantz wol angezogen hatt: wiewol an diſem

A4^v

Vorrede.

wenig gelegen ift/ von weme/ wa/ vnnd wannhåre: fonder was gefchriben ift/ da
ligt der hafftfein. Dahin wil ich eüch treüwlich gewifen/ vnnd hiemit gebetten ha-
ben/ meinen fleiß vnnd mühe nitt in vngütem/ wie der laidig brauch ift/ fonder in
freündtlichait zûuermercken/ vnnd das verhalten/ neidt/ vnnd übel wõllen/ darmit
wir ainander/ vor allen andern vólckern befchweren/ faren laffend/ vnnd das
felb den hellifchen gaiftern/ den fürften vnnd ftifftern aller
vnrûhe vnnd zwytracht/ befelhendt: fo würt fich
Gott der allmechtig vnfer noch erbar-
men/ Amen. Geben zû Kauff-
beüren. 14. Maij.
1550.